



Crna Gora  
Ministarstvo vanjskih poslova  
Generalni direktorat za bilateralne poslove



Br: 3/6 - 900/26 - 1633

18. maj 2026.

## PRIJEDLOG

### IZVJEŠTAJ

**o učešću potpredsjednika Vlade Crne Gore za međunarodne odnose i ministra vanjskih poslova mr Ervina Ibrahimovića na 5. Antalijskom diplomatskom forumu (ADF), Antalija, Republika Turska, 17-19. april 2026.**

*Na poziv ministra vanjskih poslova Republike Turske Hakana Fidana, potpredsjednik Vlade za međunarodne odnose i ministar vanjskih poslova Crne Gore mr Ervin Ibrahimović učestvovao je na 5. Antalijskom diplomatskom forumu, koji je održan u Antaliji od 17. do 19. aprila 2026. godine, sa temom „Mapping Tomorrow, Managing Uncertainties”, pod pokroviteljstvom predsjednika Republike Turske Redžepa Tajipa Erdogana i u organizaciji Ministarstva vanjskih poslova Republike Turske. Delegaciju ppv i mvp su činili: Periša Kastratović, državni sekretar MVP, Vuk Rakočević, otpravnik poslova a.i. Ambasade Crne Gore u Republici Turskoj, Perko Mijatović, prvi sekretar u Kabinetu ministra i Tamara Volkov, prva sekretarka u Generalnom direktoratu za NATO.*

*Program ppv i mvp Ibrahimovića bio je sadržajan i obuhvatio je učešće na zvaničnom otvaranju Foruma, nastup na panelu posvećenom Balkanu, učešće na sastanku Balkanske mirovne platforme, bilateralne sastanke i medijske aktivnosti.*

**Peti Antalijski diplomatski forum** bio je posvećen upravljanju neizvjesnostima u međunarodnim odnosima, u kontekstu pojačanih geopolitičkih tenzija, promjene odnosa moći, rasta trgovinskih barijera i sve većeg pritiska na multilateralizam. Ovogodišnji ADF okupio je učesnike iz preko 150 država, uključujući više od 20 šefova država i vlada, 15 zamjenika šefova država i vlada, preko 50 ministara, među kojima više od 40 ministara vanjskih poslova, kao i više od 460 visokih zvaničnika.

Forum je otvoren obraćanjem ministra vanjskih poslova Republike Turske Hakana Fidana, nakon čega se učesnicima obratio predsjednik Republike Turske Redžep Tajip Erdogan. **Ministar Fidan** je u obraćanju akcentovao da je diplomatija danas relevantnija nego ranije, posebno u uslovima slabljenja multilateralizma i „slobodnog pada” globalnog poretka. Naglasio je potrebu regionalnog fokusiranja na krizama i zrelijeg zajedničkog djelovanja. Posebnu pažnju Fidan je posvetio krizi na Bliskom istoku. **Predsjednik Erdogan** je u svom obraćanju ocijenio da se postojeći međunarodni sistem nalazi u moralnoj i egzistencijalnoj krizi. Kao najizraženiji primjer strukturnog neuspjeha i krize legitimiteta aktuelnog poretka naveo je Gazu, ističući da međunarodne institucije nijesu pokazale sposobnost da zaštite civile i obezbijede pravdu. Prema njegovoj ocjeni, poredak zasnovan na „pravu jačeg” ne

može proizvesti pravedniji svijet, niti riješiti postojeću sistemsku krizu. Turski predsjednik je naglasio i da je Turska integralni dio Evrope i da ostaje posvećena cilju punopravnog članstva u EU, uz poruku da Ankara želi jačanje globalne solidarnosti i kroz velike međunarodne skupove koji će biti održani u Turskoj - julski NATO samit u Ankari i konferenciju COP 31, koja će se održati u novembru tekuće godine u Antaliji.

**Potpredsjednik Vlade i ministar vanjskih poslova Ibrahimović** je učestvovao na panelu „Harvesting Peace in the Balkans: Dialogue, Business and Connectivity”. Na panelu su, pored ppv i mvp Ibrahimovića, učestvovali ministar vanjskih poslova BiH Elmedin Konaković, prvi potpredsjednik Vlade i ministar vanjskih poslova i dijaspora Kosova Glauk Konjufca, ministar vanjskih poslova Srbije Marko Đurić, ministar vanjskih poslova i spoljne trgovine Sjeverne Makedonije Timčo Mucunski, ministar za Evropu i vanjske poslove Albanije Ferit Hodža, zamjenik ministra vanjskih poslova Republike Turske Mehmet Kemal Bozaj i državni sekretar MVEP Hrvatske Frano Matušić. Panel je moderirao generalni sekretar RCC Amer Kapetanović.

Panel je bio fokusiran na to kako dijalog i povezivanje mogu doprinijeti dugoročnoj stabilnosti, snažnijoj regionalnoj saradnji i boljem prosperitetu Zapadnog Balkana. Posebno su razmatrani transport, trgovina, energetika, bezbjednost, digitalne veze, mobilnost i šira regionalna povezanost kao praktični instrumenti održivog razvoja i stabilnosti.

**Tokom svog izlaganja, ppv i mvp Ibrahimović** ukazao je na značaj međuzavisnosti povjerenja, liderstva i implementacije, naglašavajući da održivi mir i prosperitet regiona zavise od ova tri elementa. Ibrahimović je poručio sljedeće: „Ako nema povjerenja, nema ni implementacije. Ako nema liderstva, nema ni povjerenja. A bez implementacije projekata nema prosperiteta.” Ppv i mvp Ibrahimović je naglasio da Crna Gora regionalnu stabilnost posmatra kroz tri ključna stuba: jačanje dobrosusjedskih odnosa, unapređenje regionalnih inicijativa i jasan put ka članstvu u Evropskoj uniji.

**Potpredsjednik Vlade i ministar vanjskih poslova Ibrahimović** učestvovao je i na sastanku Balkanske mirovne platforme koji je održan na marginama ADF-a. Tokom sastanka razmijenjena su mišljenja o aktuelnim političkim i bezbjednosnim izazovima u regionu i širem međunarodnom kontekstu, uz poseban fokus na jačanje regionalne saradnje, evropsku integraciju država Zapadnog Balkana i unapređenje međusobne povezanosti kroz infrastrukturne i razvojne projekte. Razgovarano je i o saradnji u oblastima upravljanja krizama i prirodnim katastrofama, podršci mladima i tehnološkom razvoju, kao i o uticaju globalnih geopolitičkih kretanja, uključujući rat u Ukrajini i situaciju na Bliskom istoku, na stabilnost i bezbjednosne prilike u regionu. U svom obraćanju, **ministar Ibrahimović** istakao složenost savremenih geopolitičkih okolnosti i rastuću globalnu neizvjesnost. Ukazao je na krhkost bezbjednosne situacije na Bliskom istoku, naglašavajući značaj postignutog primirja kao ograničenog, ali važnog koraka ka deeskalaciji. Balkansku mirovnu platformu ocijenio je kao važan okvir za jačanje regionalnog dijaloga, koordinaciju stavova i unapređenje otpornosti regiona. Potvrdio je snažnu posvećenost Crne Gore evropskoj integraciji kao strateškom prioritetu. Istakao je značaj unapređenja regionalne saradnje kroz jačanje kapaciteta za upravljanje vanrednim situacijama, razvoj infrastrukture i energetske povezanost, kao i podršku inovacijama i mladima.

***Na marginama Foruma, ppv i mvp Ibrahimović održao je sastanke sa ministarkom vanjskih poslova Palestine Varsenom A. Šahinom, ministrom vanjskih poslova Kostarike Arnoldom Andreom Tinokom, državnim ministarkom za vanjske poslove i trgovinu Singapura Gan Sio Huang, potpredsjednikom Vlade i ministrom vanjskih poslova Moldavije Mihaiem Popšojem, kao i direktorom za Zapadnu Evropu u EEAS-u Emanuelom Žofreom. Pored navedenog, realizovani su i susreti sa predstavnicima regiona, uključujući sastanak sa Arminom Hodžićem, zastupnikom albanske, bošnjačke, crnogorske, makedonske i slovenačke nacionalne manjine u Hrvatskom saboru, kao i kraći susret sa ministrom vanjskih poslova Kosova Glaukom Konjufcom.***

## **ZNAČAJ UČEŠĆA**

Učešće ppv i mvp Ibrahimovića na 5. Antalijskom diplomatskom forumu obilježeno je aktivnim i zapaženim nastupom u okviru jednog od značajnijih savremenih međunarodnih diplomatskih formata. Forum je pružio prostor za predstavljanje Crne Gore kao stabilne, proevropske i kredibilne NATO članice, te konstruktivnog regionalnog aktera, spremnog da doprinese dijalogu, povezivanju i praktičnoj saradnji na Zapadnom Balkanu.

Učešće na Balkanskoj mirovnoj platformi dodatno je važno jer Turska ovaj format sve više pozicionira kao kanal regionalnog dijaloga. Za Crnu Goru je korisno da u ovim formatima bude prisutna, ali uz jasno profilisanje sopstvenih pozicija: evropska integracija regiona, podrška stabilnosti, poštovanje suvereniteta i izbjegavanje inicijativa koje bi mogle relativizovati postojeće obaveze u okviru EU i NATO agende.

Pored susreta sa kolegama iz regiona i EU, ostvareni su kontakti sa državama Azije i Latinske Amerike, pri čemu su inicirani susreti na visokom nivou, kao i održavanje bilateralnih konsultacija u narednom periodu. Time je dodatno potvrđena potreba širenja diplomatskog dometa Crne Gore, posebno u kontekstu ekonomske diplomatije, investicija, turizma, energetike i jačanja političkih veza sa državama izvan neposrednog evroatlantskog kruga.

**Ukupno posmatrano, učešće ppv i mvp Ibrahimovića na ovogodišnjem ADF- u doprinijelo je dodatnom političkom profilisanju Crne Gore kao kredibilnog i konstruktivnog partnera u regionalnim i multilateralnim okvirima. Ostvareni kontakti i razmijenjena mišljenja sa predstavnicima većeg broja država dodatno su potvrdili značaj aktivnog prisustva Crne Gore na forumima ovog tipa, posebno u kontekstu jačanja političke vidljivosti, EU integracija, međunarodnog umrežavanja i afirmacije vanjskopolitičkih prioriteta.**

## **PRIJEDLOG ZAKLJUČAKA:**

Vlada Crne Gore je na sjednici održanoj \_\_\_\_\_ 2026. godine, razmotrila i usvojila Izvještaj o učešću potpredsjednika Vlade Crne Gore za međunarodne odnose i ministra vanjskih poslova mr Ervina Ibrahimovića na 5. Antalijskom diplomatskom forumu (ADF), Antalija, Republika Turska, 17-19. april 2026. godine.